

CONVENIO DE COLABORACIÓN ENTRE A CONSELLERÍA DE CULTURA, EDUCACIÓN E UNIVERSIDADE DA XUNTA DE GALICIA E O CONCELLO DE ARES, PARA AMPLIACIÓN DO CPI AS MIRANDAS.

En Santiago de Compostela, a 29 de marzo de 2022

REUNIDOS

Dunha parte, Román Rodríguez González, conselleiro de Cultura, Educación e Universidade, nomeado para tal cargo polo Decreto 112/2020, de 6 de setembro (DOG núm. 181, do 7 de setembro), e actuando de conformidade coas facultades que lle atribúe o artigo 34 da Lei 1/1983, do 22 de febreiro, de normas reguladoras da Xunta e da súa presidencia, e o Decreto 198/2020, do 20 de novembro, polo que se establece a estrutura orgánica da Consellería de Cultura, Educación e Universidade.

Doutra, _____, na súa condición de alcalde do Concello de Ares, no exercicio das competencias que lle atribúe o artigo 21.1.b) da Lei 7/1985, de 2 de abril, reguladora das bases de réxime local e o artigo e 61.1.a) da Lei 5/1997, do 22 de xullo, de Administración Local de Galicia.

Ambas as partes recoñécense mutuamente capacidade legal suficiente para subscribir o presente convenio de colaboración, e a tal efecto

EXPOÑEN

Primeiro.- Que as administracións das comunidades autónomas poden celebrar convenios de colaboración coas corporacións locais ou con outros entes de dereito público e con persoas físicas ou xurídicas suxeitas ao dereito privado, ao abeiro do disposto no artigo 48 da Lei 40/2015, do 1 de outubro, de réxime xurídico do sector público (LRXSP).

Segundo.- Que segundo o artigo 193 da Lei 5/1997, do 22 de xullo, de administración local de Galicia, as entidades locais galegas e a Xunta de Galicia adecuarán a súa actuación aos principios de colaboración, cooperación e auxilio que puidesen precisar coxunturalmente para o eficaz cumprimento das súas tarefas.

A colaboración entenderase como o deber de todas as administracións públicas de ponderar e respectar, nas súas respectivas actuacións, a totalidade dos intereses públicos implicados, así como, no traballo en común para a solución daqueles problemas que puidesen exporse máis alá do concreto reparto competencial.

Terceiro.- Que o artigos 25.2.n) da Lei 7/1985, do 2 de abril, reguladora das bases do réxime local, establece que o municipio exercerá, en todo caso, como competencias propias, nos termos da lexislación do Estado e da Comunidade Autónoma, entre outras, *"participar na vixilancia do cumprimento da escolaridade obrigatoria e cooperar coas Administracións educativas correspondentes na obtención dos soares necesarios para a construción de novos centros docentes. A conservación, mantemento e vixilancia dos edificios de titularidade local destinados a centros públicos de educación infantil, de educación primaria ou de educación especial"*. Estas competencias asúmense pola Comunidade Autónoma de Galicia, respecto dos municipios do seu ámbito territorial, en virtude da letra ñ) do artigo 80.2 da Lei 5/1997, do 22 de xullo.

As disposicións adicionais primeira e cuarta da Lei 5/2014, do 27 de maio, de medidas urxentes derivadas da entrada en vigor da Lei 27/2013, do 27 de decembro, de racionalización e sustentabilidade da Administración local, dispoñen que as competencias atribuídas ás entidades locais pola lexislación autonómica anterior á entrada en vigor da Lei 27/2013, do 27 de decembro, continuarán exercéndoas elas, rexéndose pola indicada lexislación ou, no seu caso, polo dereito estatal aplicable como supletorio, sen prexuízo do disposto nas disposicións adicionais cuarta e quinta da Lei 27/2013, do 27 de decembro. As competencias que debe asumir a Administración da Comunidade Autónoma de Galicia en materia de educación, saúde e servizos sociais en cumprimento das disposicións da citada Lei 27/2013, do 27 de decembro, continuarán prestándose polos municipios en tanto non se dean as condicións previstas para o seu traspaso na normativa básica e, en particular, o establecemento do novo sistema de financiamento autonómico e das facendas locais previsto na mesma.

Así mesmo, a disposición adicional décimo quinta, apartado 4, da Lei Orgánica 2/2006, do 3 de maio, de educación, determina que os municipios cooperarán coas Administracións educativas correspondentes na obtención dos solares necesarios para a adaptación ou construción dos centros docentes.

Cuarto.- Que a Consellería de Cultura, Educación e Universidade, en harmonía co artigo 31 do Estatuto de autonomía de Galicia, ten as atribucións en materia de planificación, regulación e administración do ensino regrado en toda a súa extensión, niveis e graos, modalidades e especialidades.

Quinto.- Que co fin de materializar a cooperación para potenciar o desenvolvemento do sistema educativo galego, en especial no que atinxe á comunidade escolar da entidade local, a Xunta de Galicia, a través da Consellería de Cultura, Educación e Universidade, e o Concello de Ares, acordan subscribir o presente convenio de colaboración para a ampliación do CPI As Mirandas.

Sexto.- Que conscientes da antedita necesidade as partes intervenientes acordan unir os seus esforzos para acadar o obxectivo sinalado. Por iso, e a fin de levar adiante o proxecto no Concello de Ares, é necesaria a concorrencia de medios e achegas de ambas as dúas partes interesadas, polo que é preciso determinar o contido da mencionada colaboración, co fin de acadar un encaixe da actuación dentro do marco normativo en vigor.

Así, e co fin de acadar o obxectivo exposto, ambas as partes, de común acordo, declaran a súa vontade de subscribir o presente convenio, de acordo coas seguintes

CLÁUSULAS

Primeira.- Obxecto do convenio

Constitúe o obxecto do presente convenio o establecemento da colaboración necesaria entre a Xunta de Galicia, a través da Consellería de Cultura, Educación e Universidade e o Concello de Ares para a ampliación do CPI As Mirandas, de acordo co establecido na cláusula segunda do presente convenio.

Segunda.- Compromisos e achegas das partes asinantes

Polo Concello de Ares:

- O concello pon a disposición os terreos, na superficie suficiente para ampliación do CPI As Mirandas, conforme acordo plenario do 30 de outubro de 2014, unha vez aprobado de xeito definitivo o novo Plan Xeral de Ordenación Municipal do Concello de Ares "PXOM" (BOP núm. 186 do 04.11.2020), no que, segundo informe urbanístico do técnico municipal, as parcelas situadas na rúa Celso Emilio Ferreiro, termo municipal de Ares, están clasificadas como solo urbano, dentro da ordenanza de equipamentos.
- Estes terreos póñense a disposición da consellería sen reserva ningunha e cos servizos urbanísticos e infraestruturas (abastecemento de auga, subministro eléctrico coas características e potencia necesaria para o funcionamento do centro educativo, saneamento e rede de sumidoiros), así como os correspondentes permisos, licenzas e autorizacións necesarios, incluída a de levar a cabo os estudos xeotécnicos. Dita posta a disposición é libre de cargas e gravames, con eliminación de calquera obstáculo que impida o normal funcionamento do centro escolar. A ampliación do centro educativo contará con todos os espazos e dotacións que esixe o Real decreto 132/2010, do 12 de febreiro, polo que se establecen os requisitos mínimos dos centros que impartan as ensinanzas do segundo ciclo da educación infantil, a educación primaria e a educación secundaria e axustarase as determinacións do Plan de Nova Arquitectura Pedagóxica.
- As licenzas de edificación necesarias para ampliación do CPI serán outorgadas polo Concello de Ares, sempre que as obras proxectadas cumpran as determinacións da lexislación e do planeamento urbanístico de aplicación. Para este fin, achegarse proxecto básico e de execución, nos que se encontrarán claramente xustificadas as condicións urbanísticas e toda a normativa técnica de aplicación ao tipo de edificación que se pretende construír. O Concello de Ares achegará á consellería a documentación que se relaciona no ANEXO I deste convenio de colaboración.

- Será responsabilidade do Concello de Ares garantir que os terreos onde se pretende a execución da obra estean dotados, ao pé da parcela, dos usos urbanísticos e das infraestruturas adecuadas para o servizo educativo (abastecemento de auga, subministración eléctrica, saneamento e rede de sumidoiro) tal e como se establece no ANEXO II, con carácter previo ao inicio das obras, así como solicitar e obter os correspondentes permisos e autorizacións necesarias para levalas a cabo.
- Unha vez asinado o convenio e para posibilitar a realización dos estudos xeotécnicos e topográficos que procedan, o Concello de Ares realizará, en toda a súa superficie, a limpeza e desbroce da parcela, na que se construírá a ampliación do CPI. Con posterioridade á realización desta limpeza e desbroce, a consellería encargará a realización dos estudos técnicos e a redacción do proxecto técnico.
- En todo caso, antes da finalización das obras do centro educativo, o concello completará a urbanización con acceso rodado, pavimentado e dotado de beirarrúas, para garantir a seguridade do alumnado.
- A entidade local, comprométese a aprobación do proxecto técnico comprobando que o mesmo cumpre todos os requisitos técnicos e administrativos para a súa aprobación, conforme ao establecido na Lei 2/2016, do 10 de febreiro, do solo de Galicia, e demais normativa de aplicación. Previamente á concesión da licenza de obras, o Concello de Ares solicitará aos organismos competentes as autorizacións sectoriais que sexan procedentes.
- Na medida en que se trata dunhas obras de interese público, o Concello de Ares bonificará o 95% da contía do imposto municipal sobre construcións, instalacións e obras.
- A titularidade, así como o mantemento e conservación do centro corresponderán ao Concello de Ares. Para tal fin, unha vez rematadas as obras, a Consellería de Cultura, Educación e Universidade trasladará ao concello copia da acta de recepción.

Pola Consellería de Cultura, Educación e Universidade:

- Realizados polo Concello de Ares os trámites sinalados anteriormente e logo do informe favorable dos técnicos da Consellería de Cultura, Educación e Universidade sobre a idoneidade dos terreos obxecto da posta a disposición, a Consellería elaborará, no seu caso, supervisará e aprobará o proxecto básico e de execución para a obra de ampliación do CPI As Mirandas.
- Unha vez supervisado o proxecto básico e de execución, a Consellería de Cultura, Educación e Universidade iniciará a tramitación da contratación do gasto con cargo aos seus orzamentos, así como a tramitación dos correspondentes expedientes de licitación, dirección e execución das obras de ampliación do CPI, supeditándose o inicio da execución das obras á concesión da correspondente licenza de obra.

Terceira.- Mecanismos de seguimento

A fin de realizar o seguimento e a avaliación do grao de execución do convenio, así como a interpretación e cumprimento do convenio, ambas as partes conveñen a constitución dunha comisión mixta de seguimento, composta por tres representantes de cada unha das partes signatarias.

A Comisión de Seguimento reunirse sempre que o solicite algunha das partes, así como no caso en que xurda algún tipo de controversia durante a súa execución.

A comisión rexerá polo establecido na Lei 40/2015, do 1 de outubro, de réxime xurídico do sector público e estará presidida por quen acorden os membros da comisión por maioría simple e actuará como secretaria/o quen se designe da mesma forma.

Cuarta.- Vixencia

O presente convenio entrará en vigor na data da súa sinatura e estará vixente ata o momento en que rematen as actuacións recollidas na cláusula segunda, con data de vencemento prevista do 30 de setembro do ano 2023.

A vixencia do presente convenio poderá prorrogarse coa conformidade expresa das partes intervenientes no caso de que non se rematasen as obras previstas nel, e sempre dentro dos límites establecidos no artigo 49.h) da Lei 40/2015, do 1 de outubro, de réxime xurídico do sector público.

Quinta.- Extinción e modificación do convenio

1. Ademais da expiración do seu prazo de vixencia e o cumprimento do seu obxecto, o convenio extinguirase polas seguintes causas de resolución:

- a) O incumprimento total ou parcial dalgunha das estipulacións que o regulan.
- b) O transcurso do tempo fixado sen que se executen e/ou xustifiquen as actuacións obxecto da subvención ou sen se ter acordado a súa prórroga.
- c) O acordo unánime de todas as partes asinantes.
- d) A decisión xudicial declaratoria da nulidade do convenio
- e) Calquera outra causa prevista nas leis

2. As modificacións do convenio adoptaranse por acordo expreso e escrito das partes asinantes, e de acordo cos trámites que esixa a normativa vixente.

Sexta.- Natureza xurídica e xurisdición competente

Este convenio ten natureza administrativa, e queda fóra do ámbito da Lei 9/2017, do 8 de novembro, de contratos do sector público, que os exclúe expresamente o artigo 6.1.

O réxime xurídico aplicable ao mesmo é o establecido no Capítulo VI, Título Preliminar da Lei 40/2015, do 1 de outubro.

Calquera cuestión que se suscite en canto á aplicación, interpretación e efectos do convenio, que non queden solventadas pola comisión mixta de seguimento prevista na cláusula terceira serán resoltas polos órganos competentes da xurisdición contencioso-administrativa.

Sétima.- Publicidade e rexistro do convenio. Consentimento para a publicidade de datos persoais que figuran no convenio

Ambas as partes asinantes comprométense a dar a este convenio a debida publicidade.

Estarase ao disposto no artigo 15 da Lei 1/2016, do 18 de xaneiro, de transparencia e bo goberno, sobre as obrigas específicas de información sobre convenios.

A Consellería de Cultura, Educación e Universidade inscribirá o presente convenio de colaboración no Rexistro de Convenios da Xunta de Galicia, en cumprimento do disposto no artigo 2.3 a) do Decreto 126/2006, do 20 de xullo.

Así mesmo, a súa sinatura implica a autorización das persoas asinantes para incluír e facer públicos a través do Portal de Transparencia e Goberno Aberto da Xunta de Galicia os datos de carácter persoal contidos no convenio.

Oitava.- Protección de datos persoais

As partes asinantes responsabilizaranse de que calquera tratamento de datos persoais que puideran levarse a cabo en virtude do mesmo se realice con absoluto respecto ás normas de seguridade e de conformidade co establecido no Regulamento 2016/179 (UE) Xeral de Protección de datos (en adiante, RXPd), na Lei Orgánica 3/2018, do 5 de decembro, de protección de datos persoais e garantía dos dereitos dixitais (en adiante, LOPDGDD) e demais normativa concordante.

Os datos persoais das persoas físicas asinantes do Convenio serán tratados polos asinantes unicamente para a adecuada formalización e desenvolvemento do mesmo e en base ao disposto no artigo 6.1 b) do RXPd.

Novena.- Notificación electrónica

Segundo o artigo 14.2 da Lei 39/2015, do 1 de outubro, do procedemento administrativo común das administracións públicas, os colectivos que están obrigados a relacionarse a través de medios electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que

este obrigado a relacionarse electronicamente coa Administración e, os empregados das administracións públicas para os trámites que realicen con elas por razón da súa condición de empregado público.

As notificacións realizaranse só por medios electrónicos a través do Sistema de Notificación Electrónica de Galicia Notifica.gal, (<https://notifica.xunta.gal>). Para poder acceder a unha notificación electrónica, o interesado deberá contar cun certificado electrónico asociado ao NIF que figure como destinatario da notificación (persoa física ou xurídica). Así mesmo, o interesado pode autorizar a calquera outra persoa a acceder ao contido das súas notificacións.

E en proba de conformidade, asinan o presente convenio no lugar e data indicados, quedando un exemplar en poder de cada unha da partes asinantes.

POLA XUNTA DE GALICIA
O conselleiro de Cultura, Educación e
Universidade

Román Rodríguez González

POLO CONCELLO DE ARES
O alcalde

ANEXO I

Documentación que debe achegar o Concello de Ares no expediente de posta a disposición dos terreos:

1.- Certificación do acordo plenario que debe conter os extremos seguintes:

a) Posta a disposición, libre de cargas e gravames, sen reserva ningunha, da parcela descrita na cláusula segunda deste convenio.

b) A asunción das obrigas económicas que, se é o caso, se deriven do convenio.

c) A obriga de asumir, unha vez recibidas as obras e logo da comunicación da consellería, o mantemento e conservación das instalacións do centro educativo.

2.- Certificación da persoa titular da Secretaría da corporación, na que se faga constar que os terreos que se poñen a disposición, son titularidade do concello, e constan no inventario de bens da dita corporación.

3 -Plano topográfico coas súas medicións características, así como certificación urbanística acreditativa das condicións de uso, edificabilidade e de ocupación da parcela, que permitan comprobar a súa idoneidade para a ampliación do centro docente.

ANEXO II

Determinación dos usos urbanísticos e infraestruturas (abastecemento de auga, subministro eléctrico, saneamento, acceso rodado, etc.) da parcela:

- Abastecemento de auga.
 - Acometida con subministración eléctrica a pé de parcela, coas características e potencia necesaria para o funcionamento do centro e que figurarán no proxecto de instalación eléctrica que lle será facilitado pola dirección de obra.
- Saneamento e rede de sumidoiro.
 - Limpeza e desbroce da parcela na que se construírá a ampliación do CPI, para permitir a realización dos estudos técnicos previos ao encargo do proxecto.
 - Con posterioridade á realización da limpeza e desbroce da parcela, e en todo caso, antes da finalización das obras, o concello completará a urbanización con acceso rodado, pavimentado e dotado de beirarrúas, para garantir a seguridade do alumnado.
 - Eliminación de calquera servidume que grave a parcela e de calquera obstáculo que impida o normal funcionamento do referido centro escolar.